

Yipitjanya Ngurrara Tjuṭaku Wantirriyanutja

¹ Ngayulu Puulalu Yipitjanya ngurrara tjuṭaku piipa ngaatjanya wakara wantirriyanı, nyurrangarrimpa. Katutjalu yirriṭi watjanu ngayulu Yiitju Kurayitjaku waarrkana nyinanytjaku. Ngayulu kuliṇi nyurrangarri tjukarurru nyinanyi Yiitjuku. ² Paapa Katutjalu, mayutju Yiitju Kurayitjaluṭarra nyurrangarrinya yaṇtayaṇtaṇi, yunpanyurra nyinanytjaku. Ngayuluṇa yunytjurringanyi yalatjiku nyurrangarri yunypa nyinanytjaku.

³ Mayutju nganampa Yiitju Kurayitjanya nyinanyi. Paapa Katutjalu Yiitjunya palumpa katja ilkaringuru wantirriyanu. Palunyalaka pułkawani!, Yiitjunya nganampa ngalya wantirriyanutjangka. Yilta nganaṇa palumpa walytja nyinanyi. Katutjalu nganaṇanya uwankarra yungkula yaṇtayaṇtalpayi. Paluru nganaṇanya nyinatjunku ilkaringka kana kutu nyinanytjaku. ⁴ Manta ngaranytjawiyangka yurrunpa Katutjalu Yiitju Kurayitjanya watjanu yalatji, “Ngula, nyuntu manta ngurrara tjuṭa ngulytjula!, tjana ngayuku walytja tjuṭa tjukarurrułpi nyinanytjaku.” ⁵ Yaṇangu tjuṭakulampa yunytju nyinarra Katutjalu Yiitjunya watjanu paluru nganaṇanya ngulytjuntjaku, Katutjaku walytja tjuṭalpi nganaṇa nyinanytjaku. Nganaṇa palumpa walytja, katja tjuṭa, yuntałpa tjuṭa

nguwanpa nyinanyi. ⁶ Katutjanya Yiitjuku yunypa nyinanyi. Yiitju paluru nganañanya ngulytjuntjala Katutjanya nganampa alturulpi nyinanyi. Yalatji kulira nganaña Katutjanya pułkawaninytjaku.

⁷⁻⁸ Kurayitja paluru ngurrka tjutirra mirrirringu, tjiipi tjawirrilyi nguwanpa wakara mirlintanutja. Yalatji paluru mirrirringu nganampa kuya wanininytjaku. Yalatjilampa kuya wanirra nganañanya paluru ngulytjuñu. Yuwa, Katutjalu Yiitjunya wantirriyara nganampa punturalpi altururringkula nyinanyi. ⁹⁻¹⁰ Yiitju Kurayitjanya nganampa waralyngarala mirrirringutjangka nganaña yalatji nintingku kulinı, “Yilta nganampa altururringkula Katutjalu palumpa katja wantirriyanu.” Katutjalu yurrunpa nintingku kulinu Yiitju Kurayitjalu palumpa waarrka mantangka palyarinkunytjaku. Yiitju paluru Katutjalu nintintjawananangka palyara ngula piyku palyanmalpa. Yiitju Kurayitjanyalpi mayutju tiña nyinaku ulaataku.

¹¹ Ngula palyalkitjangku Katutjalu yurrunpa kulinu. Yałatji kulira wiya wantipayi. Yalatji kulira tjukarurru palyalpayi. Yalatji Katutjalu yurrunpa kulinu Yiitju Kurayitjalu nganañanya ngulytjura kanyintjaku. Palulanguru nganañatju Tjuwu tjuta, palumpa walystja tjuta nyinanyi. ¹² Yurrunpa nganañanyatju Katutjalu ngulytjuñu nganañatju palunya walkuntjaku yalatji kulira, “Katutjalu yirriti watjara Yiitju Kurayitjanyalampa ngalya wantirriyalku.” ¹³ Nyurrangarritjarra Tjuwuwiya tjutangkulpi wangka Yiitju Kurayitjanyatjarra kulira palumpa

walytjarringu. Paluru nyurrangarrimpa kuya wañingu nyurrangarrinya palumpa ngurrangka kana nyinatjunkukitjangku. Yalatjinyurra ngulytjurrinytjala Katutjalu nyurrangarrila palumpa kurrunpa tjarrpatjunu, yañangu tjutangku yalatji kulintjaku, “Tjana Katutjaku kurruntjarra nyinanyi, palumpa walytja tjuña yilta.”¹⁴ Katutjaku kurrunpa nganañala tjarrpatjunutjangka yalatji nganaña kulintjaku, “Palumpa kurrunpa nganañala yilta tjarrpangu. Yalatji nganañala tjarrpatjunkula yilta nganananya palumpa ngurrangka nyinatjunku, kana kutula nyinaku. Ngurra palula nganana palya nyinamalpa, nganaña Katutjanya kututja pułkawañimalpa.”

Katutjanya Puulalu walkulku

15-16 Tjakulpa tjuña kulilpayi nyurrangarri Yiitju Kurayitjaku tjukarurru nyinapayi. Yalatjiñarra ngayulu kulilpayi nyurrangarri Yiitjuku walytja kutjupa tjuñaku yunyju nyinapayi. Tjakulpa yalatjiña kulinutjangku Katutjanya walkulpayi yalatji, “Yipitjanya ngurrara tjuña tjukarurru nyinanyi, nyuntu tjananya yanťayanťaningka.”¹⁷ Nganampa mayutju Yiitju Kurayitjaku paapa Katutjanya nyinanyi. Ngayulu Katutjanya nyurrangarrimpa tjapilpayi paluru nyurrangarrila palumpa kurrunpa tjarrpatjunkunytjaku. Kurrunpa palunyatjarrangkunyurra nintingku kulilkü Katutjaku tjukarurru nyinakitjangku.
18 Katutjanya ngayulu tjapilpayi nyurrangarri Yiitjuku wangkaku puntura nintirrinytjaku,

palumpa walytja tjuṭanyurra tjukarurru kutu nyinanytjaku. Yalatji nintirringkula nyurrangarri kulikku, “Katutjalu nganaŋanya ngulytjunu palumpa walytja tjuṭa nyinanytjaku. Kurayitjaku nganaŋa ngulytjurringkula palumpa ngurrangka nyinamalpa, palya. Ngurra paluru palyalingku ngaranyi.”

19-20 Nyurrangarri Yipitjanya ngurrara tjutangku wangka ngaatjanya kulintjaku. Katutjanya paawu puntu nyinanyi. Paluru nganaŋanya rapani palumpa waarrka nganaŋa palyantjaku. Paawu puntutjarrangku paluru Yiitju Kurayitjanya mirringuru pakaltjinganu. Pakaltjingara katirra nyinatjunu palumpa ngurrangka yilkaringka, mayutju tiŋa tjungupula nyinanytjaku. **21** Ngurra palula Yiitju Kurayitjanya mayutju tiŋa nyinanyi. Paluru yuwankarraku mayutju tiŋa nyinanyi, ilkari ngurrara tjuṭaku, manta ngurrara tjuṭakuṭarra. Ngula mayutju kutjupa tjuṭa nyinaku. Yiitju Kurayitjanya tjanampa mayutju tiŋa nyinaku. **22** Katutjalu Yiitju Kurayitjanya nyinatjunu yuwankarraku mayutju tiŋa nyinanytjaku, Yiitjuku walytja tjuṭakuṭarra. Paluru ilta nganampa mayutju tiŋa nyinanyi. **23** Nganaŋa Yiitjuku walytja tjuṭa pamuli kutju palumpa nyinanyi, paluru nganampa tjamu tiŋa nyinanyi. Palurulampa matupurra walytja tjuṭaku nyinanyi, yantayantalpayi. Palurulanya watjantjala nganaŋa kulira palumpa waarrka palyalpayi.

2

“Yirritinyurra kuya palyara nyinapayi”

¹ Yirriti nyurrangarri kuya kututja palyara nyinapayi Katutjanya kulintjawiya. ² Katutjaku ngurrpa tjutangku kuya palyantja nguwanpa nyurrangarri kuya kutu palyalpayi. Mamuku mayutjungku nyurrangarrinya tjingapunganyingka kuliranyurra palyalpayi. Paluru Katutjaku ngurrpa tjutaku mayutju tiŋa nyinanyi. ³ Katutjaku ngurrpa tjuŋa nguwanpa, nganana yurrunpa nyinangi yalatji. Nganana tjaalpangku kutju kulira kuya kutu palyalpayi. Nganana yalatji nyinanytjala Katutjalulampa ngurrkur-ringkula kuliŋu, “Yipitjanya ngurrara tjuŋa, Pu-ulanyaŋarra ngayulu warungka waŋiku, kuya palyalpayi kutjupa tjutatarr.”

⁴⁻⁵ Palunyatjanu Katutjanya nganampa puntura yunytjurringkula yaltururringu. Yaltururringkulalpi paluru kuliŋu, “Ngayulu Yiitju Kurayitjanya mantakutu wantirriyalku, kuya palyalpayi tjutangku palumpa wangka kulira walytjarringkulalpi ngayuku kalyparrinytjaku.” Yalatji Katutjalu nganaŋanya yilta ngulytjura nyinatjunu, althururringkula. ⁶ Yiitju Kurayitjanya mirringuru pakara kana nyinanytja nguwanpa nganana palumpa walytja tjuŋa kana kutu nyinaku palumpa ngurrangka. Ngurra palula nganana mayutju tjuŋa nguwanpa nyinaku, Yiitjulawana. Yalatji Katutjalu watjaŋu nganana Yiitjulawana kana kutu nyinanytjaku. ⁷ Yalatji Katutjalu nganaŋanya ngulytjuŋu, yanangu tjutangku, yanangu

ngan̄titja tjuṭangkuṭarraya yalatji kulintjaku, “Katutjanya yilta alṭurunytju nyinanyi nganampa, yañangu kutjupa tjuṭakuṭarra. Paluru nganampa alṭururringkula palumpa katja Yiitju Kurayitjanya mantakutu ngalya wantirriyañu, waralyngarala mirrirringkula kuyalampa wañinytjaku.”⁸⁻⁹ Katutjanyalampa kalyparringkula ngulytjurringu, nganaña palumpa wangka Yiitjunyatjarra kulintjala. Yañangu Katutjaku ngurrpa tjuṭangku palumpa wangka kulintjawiyangku yañangu kutjupa tjutangka tjana kututja tjukarurru palyalpayi, pikarrinytjawiya. Tjinguru Katutjanya tjanampa kalyparringkula ngulytjurringu, yilta?, wiya. Tjana wangka Yiitjunyatjarra kulira kutju Katutjaku kalyparringamara. Tjinguru Katutjanya tjanampa kalyparringkula ngulytjurringanyingka, tjana walytjangku pułkawaniimara, “Nganaña palya kututja nyinanytjala Katutjanyalampa kalyparringkula ngulytjurringu.” Yañangu yalatji nyinanytjala wiya Katutjanya kalyparringkula ngulytjurriku, wiya. Tjana Katutjaku wangka Yiitjunyatjarra tjukarurru kulinmara. Palunyatjanu Katutjanya tjanampa kalyparringkula ngulytjurringamara.¹⁰ Katutjalu kulin̄i nganaña Yiitju Kurayitjaku walytjarringkula yañangu tjuṭaku tjukarurru palyantjaku, tjanampa palya nyinanytjaku. Nganaña yalatji nyinanytjaku paluru Yiitjunya mantakutu wantirriyañu.

Tjuwu tjuṭa, Tjuwuwiya tjuṭatarra palumpa walytja nyinanyi

11 Tjuwuwiya tjuṭa, kulilaṇiya! Yirriṭi, Tjuwu tjuṭangku nyurrangarrinya nyakula yalatji watjalpayi, “Pala tjuṭaya watirrinnytjawiya nyinanyi, Katutjaku ngurrpa. Nganampa watirringutja tjuṭaku Katutjanya yunypa nyinanyi.”

12 Yirriṭi nyurrangarri Yipitjanya ngurrara tjuṭa, Yiitju Kurayitjaku, Katutjakuṭarra ngurrpa nyinangu. Katutjalu yirriṭi tjananya Yitjurilaku walytja ngantitja tjuta watjanu kutu tjananya yanṭayaṇṭalkitjangku. Paluru tjanala wiya nyurrangarri tjungurripayi, nyakula tjananya nyurrangarri wantirra watjalpayi, “Pala tjuta Tjuwu tjuṭa nyinanyi, nganampa ngulytjawiya. Katutjalu wiya nganaṇanya yanṭayaṇṭalpayi.” Nyurrangarri yilta Katutjaku ngurrpa nyinangi, ngula kana nyinakitjangku puṭu kulira. **13** Yiitju Kurayitjanyalpi mantakutu ngalya yankula waralyngarala mirrirringu, kuka tjawirriliyi yiluntanutja nguwanpa kuya nyurrangarrimpa waṇinytjaku, kalypalpinyurra Katutjaku nyinanytjaku, palumpa walytja tjuṭalpi.

14-15 Yipitjanya ngurrara tjuṭa nyurrangarri ninti nyinanyi yalatjiku, Tjuwu tjutaya Tjuwuwiya tjuṭaku tuunlayiki nyinanyi. Kuwarri Yiitju Kurayitjaku wangka ngaranyi nganaṇa kulintjaku. Paluru nganaṇanyatju nintilpayi nganaṇatju Tjuwu tjuṭa palumpa walytjarringkula Tjuwuwiya tjuṭaku kalypalpi nyinanytjaku. Muutjaku luuwana nganaṇatju yirriṭi nyinapayi. Kuwarri nganaṇa kulinī Yiitju Kurayitjanya waralyngarala mirrirringutjangkalpi nganaṇa palumpa wangkawanalpila nyinanytjaku, luwu palunya

kulintjawiyalpi. Nganaŋatju Tjuwuwiya tjutaku palya nyinanytjaku. ¹⁶ Yiitju Kurayitjalu watiyangka mirriringkula nganaŋanya nintiŋu wiya kutjupa tjutaku tuunlayiki nyinanytjaku. Nganaŋa palumpa walytja tjungu nyinanyi, Tjuwu tjuta Tjuwuwiya tjutatarra. Yalatji nyinarra nganaŋa kalypalpi Katutjaku nyinanyi. Yalatji Yiitju Kurayitjalu nganaŋanya nintiŋi. ¹⁷⁻¹⁸ Yuwa, yirriŋi nyurrangarri Yipitjanya ngurrara tjuta Tjuwuwiya Katutjaku wangkaku ngurrpa nyinapayi, kanya nganaŋatju Tjuwu tjuta Katutjaku wangkaku ninti nyinapayi. Yiitju Kurayitjalu mantakutu ngalya yankula yaŋangu tjuta nintilpayi Katutjaku kalypalpi nyinanytjaku, yaŋangu kutjupa tjutakuṭarra kalypa nyinanytjaku. Paluru tjananya yalatji nintiŋu nyurrangarri kulintjaku, Tjuwu tjutangkuṭarralatju kulintjaku. Yiitjulu waralyngarala mirriringkula nganaŋanya ngulytjunutjangka nganaŋa Katutjaku kalypalpi nyinanyi, Tjuwuwiya tjuta Tjuwu tjutatarra.

¹⁹ Nganaŋatju Tjuwu tjuta Yiitjuku walyt-jarringkula Katutjaku walytja tjuta nyinanyi. Nyurrangarri Tjuwuwiya tjuta Yiitjuku walytjarringkulalpi Katutjaku walytja nyinanyi, mungut-jawiya. Nganaŋa Katutjaku pamuli nyinanyi, palumpa walytja. ²⁰⁻²² Yara ngaatjanyaya kulila! Kaaka tjuta nyinaku. Kaaka yurrun-titja mayutju tjanampa nyinaku, mayutju Yi-itjunya nguwanpa. Palumpa małanypa tjuta nyinaku, Yiitjuku kutungulu tjuta nguwanpa. Katja yuntałpa tjuta tjanampa nyinaku. Katja yuntałpa paluru tjana nguwanpa nganaŋatju

Tjuwu tjuṭa nyinanyi. Katja yuntałpa kutjupa tjuṭa tjanampa nyinaku. Palunya tjananya nguwanpa Tjuwuwiya tjuṭa nyurrangarri nyinanyi. Yalatji nganaṇa Yiitjuku pamuli nyinanyi Yiitjulu nganampa mayutjungku nganaṇanya yanṭayantjani nganaṇa palumpa wangka kulira nintirringkunytjaku, Katutjaku kutju walytja tjuṭa nganaṇa nyinaku, palumpa kurrunpat-jarra.

3

Puulalu watjalku, “Tjuwuwiya tjuṭawana ngayulu tjakultjurinkupayi”

¹ Ngayulu kuwarri tjilangka nyinanyi. Yiitju Kurayitjaku waarrka ngayulu nyurrangarrila Tjuwuwiya tjuṭangka palyantjala, ngayunyan̄iya tjana witira tjilangka tjarrpatjunu. ² Nyurrangarri Yipitjanya ngurrara tjuṭa ninti nyinanyi Katutjalu ngayunya yaltururringkula watjaṇu, palumpa waarrka nyurrangarrilawana palyantjaku. ³⁻⁴ Wangka Yiitju Kurayitjanyatjarraku yaŋangu kutjupa tjuṭa ngurrpa nyinapayi. Katutjalu ngayunyalpi wangka palunya nintiṇu. Wangka panyapa Katutjalu nintiṇutja ngayulu piipa ngaangka wakan̄i. Piipa ngaatja riitarringkula nyurrangarri kulilkü yalatji, “Yiitju Kurayitjakuṇu wangkaku Puulanya ninti nyinanyi.” ⁵ Yirriṭi yaŋangu yuwankarra ngurrpa nyinapayi wangka Kurayitjanyatjarraku. Wiya Katutjalu tjananya yirrititja tjuṭa nintiṇu. Yiitjunya mantangka

nyinanytjala ngan̄tilpilanyatju Katutjaku kurrunpangku nintiñu Yiitjuku waarrkana tjutangka, Katutjaku wangka watjalpayi tjutangkaṭarra. ⁶ Wangka Kurayitjanyatjarra yalatji ngaranyi. Katutjalu yirriṭi watjanu, Yiitju Kurayitjanya mantangka yan̄angu tjutaku mayutju nyinatjunkikitjangku. Irriti Yiitjunya ngalyankunytjala nganañatju Tjuwu tjutangku kulilpayi. Tjuwuwiya tjutangkutarra palumpa wangka kulira waltyjarringkupayi. Yiitju Kurayitjaku waltyjarringkula nganañanya tjungu Katutjaku waltyja tjuta nyinanyi, Tjuwu tjuta, Tjuwuwiya tjutatarrta.

⁷ Katutjaluñi yaltururringkula watjanu ngayulu palumpa waarrkana nyinanytjaku. Paluruñi rapanu palumpa wangkaña ngurra tjutawana tjakultjunkunytjaku. ⁸ Katutjaku waltyja kutjupa tjuta ngayula munkarra nyinanyi Yiitjuku waltyja tjana rawa tjukarurru nyinapayi. Ngayulu rawa wiya palumpa waltyja nyinapayi, wiyawana ngayulu palumpa waltyja tjuta tjiilangka tjarrpatjunkupayi. Katutjalu ngayunya yaltururringkula watjanu Tjuwuwiya tjutawana wangka Yiitjunyatjarra tjakultjunkunytjaku yalatji. Yiitju Kurayitjanyalampa mayutju palyalingku nyinanyi. Paluru kuyalampa ilta wan̄ipayi, nganañanya paluru yuwankarra yantayanṭani. ⁹ Katutja paluru ngayunya watjanu yan̄angu tjutangka ngayulu nintintjaku, palumpanu wangka Yiitjunyatjarra. Katutjanya yilta mayutju tiña nyinanyi, yuwankarra palyalpayi. Katutja paluru wiya yurrunpa tjanala yan̄angu

tjuṭangka wangka palunya yutiṇu. Paluru wangka palunya yarrkatjunkula wantingu, ¹⁰ ngananaṇa palumpa walytja tjuṭangku kuwarri kutju wangka palunya yutitjalpi kulintjaku. Katutjalu kuliṇu kutjupa tjuṭangkuṭarra wangka palunya yutitjalpi kulintjaku. Nganaluya kulintjaku?, nyalpitjarra tjuṭangkuṭarra. Paluru tjana yalatji kuliṇingi, “Katutjanya palya nyinanyi, paluru munkarra kulilpayi. Paluru nintingu Yiitju Kurayitjanya mantakutu wantirriyaṇu yaṇangu tjuṭaku tjanampa kuya waṇinytjaku. Paluru tjananya yaltururringkula ngulytjuṇu.” Yalatji nyalpitjarra tjuṭangku, nyakula kulintjaku Katutjanya yunytjurringu.

¹¹ Katutjalu wangka palulawana kulira yilta Yiitju Kurayitjanya mantakutu wantirriyaṇu. Wantirriyaṇutja paluru nganampa mayutjulpi nyinanyi. Yiitju paluru Katutjaku wangka kulira waralyngarala mirrirringu kuyalampa waṇinytjaku. Yalatji nganampa kuya waṇinytjaku Katutjalu yurrunpa kuliṇu. ¹² Yiitju Kurayitjaku wangka ngananaṇa kulira walytjarringkula Katutjaku kalypalpi nyinanyi. Ngananaṇa nguluwiyangku palunya tjapintjaku. ¹³ Yalatji kuliranyurra yunypa nyinanytjaku. Tjiilangkaṇa nyinanyingka wiyanurra ngayuku watjilpa nyinanytjaku. Yipitjanya ngurrara tjuta, yalatjiya kulila! Ngayulu nyurrangarrila Yiitjukuṇu wangka tjakultjunkunyjtala nyurrangarri kuwarri palumpa walytja tjuṭa nyinanyi. Yalatji kulira ngayulu watjilpawiya nyinanyi, yunypa.

Yiitju Kurayitjanya nganampa yunytju nyinanyi

14-16 Katutjanya mayutju palyalingku nyinanyi yilta. Paluru ngangkari tiñatjarrangku ilkari ngurrara tjuta manta ngurrara tjutatarra kana kanyini. Ngayulu paapa Katutjanya tjapilpayi palumpa kurrunpangku nyurrangarrinya rapantjaku, tjukarurrunyurra Yiitjuku nyinanytjaku. **17-18** Paapa Katutjanya ngayulu yalatji tjapilpayi, nyurrangarri Yiitju Kurayitjaku walytja kutu nyinanytjala Yiitjuku kurrunpa nyurrangarrila tjarrparra nyinanytjaku. Palumpa kurrunpatjarranyurra tjukarurru kutu palumpa nyinanytjaku. Nyurrangarri, Katutjaku walytja kutjupa tjutangkuṭarra yalatji kulintjaku, “Yiitjunya ilta nganampa puntura yunytjurringu, palulanguru watiyangka waralyngarala mirrirringu nganampa kuya wañinytjaku. Wiya palurulanya kuyatjarra wantingu warukutu wañinytjaku, wiya. Puntura yunytju nganampa nyinarra paluru mirrirringu.” **19** Yuwa, paluru ilta nganampa puntura kutu yunytju nyinanyi. Ngayulu yunytjurringanyi nyurrangarri kutu nintirringkunytjaku Yiitjuku, nganampa puntura yunytju nyinapayiku. Yilta paluru yañangu tjutaku puntura yunytju nyinapayi. Palunya nguwanpa nganana yañangu tjutaku puntura yunytju nyinanytjaku.

20-21 Nganana, Yiitjuku walytja kutjupa tjutangkuṭarra Katutjanya kutu pulkawaañinytjaku, Yiitjulu nganampa kuya wañingutjangka. Katutjalu ilta

ngangkari puntutjarrangku ngananya kutu yanṭayaṇṭalpayi. Paluru nganaṇanya kulira mangarri kuka, walytja tjutaṭarra yungkupayi, nganaṇa tjapintjawiyangka. Nganaṇa yalatji kulira kutu palunya walkuntjaku. Alatji palya.

4

Yiitjuku walytja nganana pamuli nyinanyi

¹ Yiitjuku waarrka ngayulu palyarinkunytjala tjana ngayunya witira tjilangka tjarrpatjunu. Kutuṇa tjilangka nyinarra nyurrangarrinya pinangkatjunanyi Yiitjuku tjukarurru nyinanytjaku. Katutjalu nyurrangarrinya ngulytjuṇu tjukarurru palumpa nyinanytjaku. ² Yuwa, yalatji nyurrangarri tjukarurru nyinarra yaṇangu kutjupa tjutaku palya nyinanytjaku, pikarrinytjawiya. Wiya nyurrangarri walytjangku pulkawaninytjaku, rikiniwiya. Kutjupa tjutaku nyurrangarri yunytjurringkula nyinanytjaku. Nyurrangarri palya kutu tjanampa nyinanytjaku parrpaṭu wayilarinytjawiya. ³ Kutjupa tjutakunyurra kalypa nyinanytjaku, Katutjaku kurrunpangku nintintjala kulira. Kurrunpa palurulanya nintilpayi kalypa nyinanytjaku. ⁴⁻⁶ Yiitjuku walytja tjutanyurra pamuli nyinanyi. Pamuli palya nguwanpanyurra kalypa nyinanytjaku. Nganaṇa yuwankarrangku papatatji mantjira pamuli palumpa nyinanyi. Nganaṇa uwankarra Yiitjuku wangka kulira nyinanyi. Nganaṇa yuwankarra paṭaṇi Yiitjulawana palumpa ngurrangka nyinakitja. Nganaṇa kalypa

nyinanytjaku. Katutjaku kurrunpa walytjalampa nyinanyi, Yiitju Kurayitjanyalampa walytja nyinanyi. Katutjanyalampa walytja nyinanyi nganampa paapa. Paluru nganaŋanya ngulytjunu. Paluru mayutju tiŋa yaŋangu yuwankarraku nyinanyi, palumpa ngurrrpa tjutakuṭarra. Paluru yaŋangu yuwankarra yantayanṭalpayi.

⁷ Ngangkari nguwanpa Kurayitjalulanya yunyparringkula tjarrpatjunu, nganaŋa kutjuṭu kutjuṭungku palumpa waarrka palyarinkunytjaku. ⁸ Yalatji nganaŋala ngangkari nguwanpa tjarrpatjunkunytjaku, Katutjaku wangka yirriṭi tjunutja ngarrinyi yalatji,
“Mayutju paluru katukutu kalparra katiku tjananya puritjina tjuta. Paluru tjananya kalparra katikitjangku yaŋangu tjutangka ngangkari nguwanpa tjarrpatjunamalpa.”

⁹ Wangka panyapa ngarrinyi yalatji, “Katukutu kalparra tjananya katikukunyu.” Yalatjila kulintjaku yurrunpa Kurayitjanya tjarukatingu manta yunngukutu. ¹⁰ Paluru tjarukatirra piyuku katukutu kalpangu ilkaringka wirrili, yuwankarraku mayutju nyinakitja, ilkaringka nyinapayi tjutakuṭarra.

¹¹ Wangka panyapa ngaranyi yalatji, “Yaŋangu tjutangka ngangkari nguwanpa tjanala tjarrpatjunkukunyu.” Kurayitjalulampa palumpa walytja tjutangka ngangkari nguwanpa tjarrpatjunu Katutjaku waarrkala palyantjaku. Kutjupa tjutangka tjanala paluru tjarrpatjunu palumpa waarrkana

tuwalpala nyinanytjaku. Kutjupa tjutangka nganaŋala ngangkari nguwanpa tjarrpatjunu palumpa wangka kulira tjakultjunkunytjaku. Kutjupa tjutangka nganaŋala tjarrpatjunu Yiitju Kurayitjaku wangka ngurra tjutawana tjakultjurinkunytjaku. Kutjupa tjutangka nganaŋala ngangkari nguwanpa tjarrpatjunu ingkaṭa nyinanytjaku. Kutjupa tjutangka nganaŋala tjarrpatjunu palumpa wangka tjukarurru nintintjaku. ¹² Yalatji nganaŋala kutjuṭu kutjuṭungka ngangkari nguwanpa tjarrpatjunu Yiitjuku walytja kutjupa tjutatarra nintira rapantjaku, tjana tjukarurru nyinarra palumpa waarrka palyantjaku. ¹³ Nganana Yiitjukuŋu wangkawana nintirringkula nganana pamuli palya nyinaku kalypa. Nganana yuwankarrangku kulikku yalatji, “Nganana yuwankarra palumpa wangkaku nintirringkula tjukarurru kutu nyinanytjaku, Yiitju Kurayitjaku, Katutjaku katjaku. Paluru tjukarurru nyinanytja nguwanpa nganana tjukarurru nyinaku.”

¹⁴ Katutjaku wangka wiyawana nintilpayi tjuta wiya nganana kulintjaku. Nganana wangka tjanampa kulira wantintjaku. ¹⁵⁻¹⁶ Wiyawana nintilpayi tjutaku nganana palya tjanampa nyinanytjaku pikarrinytjawiya. Nganana tjanala purinypa wangkarra nintintjaku wangka Yiitjunyatjarra. Nganana palya tjanampa nyinanytjaku, Yiitjunya nguwanpa. Paluru wiyawana kulilpayi tjutaku palya nyinapayi. Paluru ilta nganampa mayutju palya nyinanyi, nganampa tjamu tina. Palurulanya palumpa walytja nganṭitja tjuta nintini palumpa waarrka nganana palyant-

jaku, palumpa walytja kutjupa tjutaku kalyparringkula yunyntju nyinarra.

Wiya nganana Katutjaku ngurrpa nguwanpa nyinanytjaku

¹⁷ Ngayulu nyurrangarrinya Yipitjanya ngurrara tjuta Kurayitjaku walytjangku pinangkatjunanyi. Wiyanyurra Katutjaku ngurrpa nguwanpa nyinanytjaku. ¹⁸⁻¹⁹ Paluru tjana Katutjaku ngurrpa tjutangku wiyawana kulira kuya palyara nyinapayi. Tjana Katutjaku wangka wantirra wiyawana nyinanyi, wiya tjana Katutjaku ngurrangka kana nyinaku, wiya. Paluru tjana puṭu kulinī tjukarurru nyinakitjangku. Tjana miita walytjawiyawanangka kutu kuya palyalpayi. Miitamiitawanaya ngarrikitja kulira nyinapayi. Yalatjiya kuya palyara tjana wiya kuntarripayi.

²⁰⁻²¹ Tjinguru ngayulu nyurrangarrinya yalatji nguwanpa nyinanytjaku yurrunpa nintilpayi?, wiya. Ngayulu nyurrangarrinya wangka tjukarurru Yiitjuniyatjarra nintilpayi. Nyurrangarri wangka palunya kulira ilta palumpa walytjarringu. ²² Ngayulu nyurrangarrinya yalatji nintilpayi. Yirriti nyurrangarri wiyawana kulira kuya palyara kutu nyinapayi. Yiitjuku walytjarringkula wiya yalatji kutu nyurrangarri kuya palyara nyinanytjaku. ²³⁻²⁴ Katutjanyaya tjapila!, palumpa kurrunpangku nyurrangarrinya nintintjaku, tjukarurrulpinyurra Katutjaku nyinanytjaku. Yirriti Katutjalu nyurrangarrinya mantangka nyinatjunkukitjangku kulinū yalatji,

“Yañangu ngaa tjuta mantangka nyinarra ngayunya nguwanpa tjukarurru nyinanytjaku.” Wangka palunya nguwanpa nyurrangarri yilta Katutjaku tjukarurru nyinanytjaku, ngunytjiwana wiya.

²⁵ Nganana yuwankarra Yiitjuku walytja tjuta, Katutjaku pamuli nyinanyi. Wiya nganana walytja kutjupangka ngunytjinytjunkunytjaku, nganana tjukarurru wangkanytjaku. ²⁶⁻²⁷ Yiitjuku walytja kutjupaku ngurrkurringkula wiya nyuntu pikarrinytjaku. Ngurrkurringkula nyuntu yankula yañangu palula piyuku kalypa wangkanytjaku. Wiya nyuntu rawa nyinanytjaku kalypa wangkanytjawiya, mamungku nyuntunya tjingapungkunytjala, nyuntu yalatji kuliltjipingka, “Ngayulu yañangu palunya yankula pungku.” Nyuntu nyinarra yalatji kulintjawiya. Rawawiya nyinarra nyuntu yankula kalypa wangkanytjaku.

²⁸ Kutjupa tjutangkunyurra yirriti waarrkawiyangku mulyatangku mani yulytjatarra mantjilpayi, tjalamilara mangarri kuka payimilalkitjangku. Yiitjuku walytjarringkula wiyanurra yalatji nguwanpa mulyatangku mantjintjaku. Tjukarurrulpinyurra nyinarra waarrkarrinytjaku maniku. Yalatji mani mantjiranyurra mangarri kuka yulytjatarra walytja payimilara kanyilku. Yalatji kanyiranyurra maralpa tjutaku yungkunytjaku.

²⁹ Wati tjuta, wangka ngaatjanyaya kulila! Tjungurringkula wiyanurra kungka kutjupangka kuya palyalkitja wangkanytjaku.

Yara palyanyurra wangkanytjaku. Kungka tjuṭa, wangka ngaatjanyaya kulila! Tjungurringkula wiyanurra wati kutjupangka kuya palyalkitja wangkanytjaku. Tjungurringkula yalatji wiya nyurrangarri wangkanytjaku. Tjungurringkula wangka palya kutjunyurra wangkanytjaku, kutjupangku yalatji kulintjaku, “Yuwa palyanyurra wangkangu, nganaṇa yalatji palya nyinanytjaku.”

³⁰ Nyurrangarri Yiitjuku waltyjarringkula Katutjaku kurrunpatjarra nyinanyi. Paluru nganaṇanya nintilpayi tjukarurru nyinanytjaku. Palurunta yalatji nintintjala tjinguru nyuntu kulira wantiku. Nyuntu kulira wantintjala paluru watjilpa nyinapayi. Katutjaku kurrunpa paluru yalatji watjilpa nyinatjipingka nyuntu palumpa wangka kulira tjukarurru nyinanytjaku. Kurrunpa palurulanya nintilpayi yalatji, “Nyuntu Yiitjuku waltyja nyinanytjala Katutjalunta katirra nyinatjunku palumpa ngurrangka. Ngurra palula nyuntu kuya palyalwiyalpi nyinamalpa.”

³¹⁻³² Nyurrangarri tjukarurru nyinanytjaku yalatji. Yaŋangu kutjupaku ngurrkurringkula wiya nyuntu yunytjuwiya palumpa kutu nyinanytjaku, kalyparringkula nyuntu palumpa palya nyinanytjaku, kaangkinytji. Yaŋangu kutjupaku nyuntu wiya pikarringkula wangkanytjaku, nyuntu palumpa kalyparringkula palya nyinanytjaku, kaangkinytji. Wiyanyurra tjungurringkula tjaalymara wangkanytjaku yaŋangu kutjupa panypurangkukitja. Yaŋangu kutjupangkunta

kuya palyantjala, nyuntu wiya palumpa tuunlayiki nyinanytjaku, nyuntu palumpa kalyparringkula nyinanytjaku Katutjanya nguwanpa. Nyuntu Yiitju Kurayitjaku walytjarrinytjala Katutjanya nyuntupa kalyparringu. Kalyparringkula, kaangkinytjilpi nyuntupa nyinanyi.

5

Yiitjuku tilingka nguwanpanyurra ninti nyinanyi

¹ Nyurrangarri Katutjaku walytja tjuta nyinanyi. Katutjanya nyurrangarrimpa kalypa nyinanyi. Nyurrangarri yaŋangu kutjupa tjutaku yalatji kalypa nyinanytjaku, Katutjanya nguwanpa. ² Yaŋangu kutjupa tjutaku nyurrangarri yunytju nyinanytjaku. Yalatji Yiitju Kurayitjanya alampa yunytju nyinarra watiyangka waralyngarala tjawirrili tjiipi nguwanpa mirrirringu, nganana katirra Katutjaku tjunutja nguwanpa. Katutjalu tjawirrili palunya yini Yiitjunya nyakula yunyparringkula nganampa kuya waŋingu.

³ Katutjaku walytja tjutanyurra nyinanyi. Katutjanya nguwanpanyurra tjukarurru nyinanytjaku. Wiyanyurra miita walytjawiyangka kuya palyantjaku. Wiya nyurrangarri yalatji kuya palyalkitjangku kulintjaku. Mani yulytja tiŋa kanyilkitjangku wiyanurra kulira yunytjurringkula nyinanytjaku. Mangarri kuka tiŋa wiyanurra yungkuwiyangku ngalkuntjaku yaŋangu kutjupa tjutanyurra

nyakula yungkunytjaku. ⁴ Yañangu kutjupa warrkinytjawiyanyurra nyinanytjaku. Wiya nyurrangarri tjungurringkula kutu wangkanytjaku miitamiiñangka ngarrikitja. Tjungurringkula Katutjaku wangkawananyurra tjukarurru wangkarra Katutjanya walkuntjaku.

⁵ Wangka ngaatjanya kulila! Wangka palulawana kuya palyalpayi tjuta wiya Katutjaku waltyta tjutaya nyinanyi, wiya tjana Yiitju Kurayitjaku waltyta nyinanyi. Paluru tjana wiya Katutjanya yunyparringkula walkulpayi, Katutjaku wangka tjana wantirra kuya palyalkitja yunyparringkupayi. Tjana maniku, mangarriku miita kutjupaku yunyparringkula nyinapayi, Katutjaku wiya.

⁶ Paluru tjana tjinguru watjalku yalatji, “Nganaña Yiitjuku waltyta tjuta palya tjungurringkula wangkanytjaku miitatjarra ngarrikitja. Palya nganaña miita kutjupa kutjupa kanyintjaku. Palya nganaña mangarri kuka tiñatarra yungkuwiyangku ngalkunytjaku, kutjupa tjuta paltjalwiyangku.” Wangka palunya tjana yalatji wiyananangku kulinì. Yalatji tjana kuya palyantjala Katutjalu tjananya ngula kuutamilara payilku. ⁷ Palula tjanalawana wiya nyurrangarri tjungurrinytjaku, wantiya!

⁸ Irriti nyurrangarri Katutjaku ngurrrpa nyinangu kuya palyalpayi tjuta. Kuwarri nyurrangarri Yiitju Kurayitjaku waltytar-ringkulalpi Katutjaku nintilpi nyinanyi. Yiitju paluru ilta nganampa mayutju nyinanyi. Katutjaku nintirringkula nyurrangarri palumpa tjukarurru nyinanytjaku. ⁹ Yalatji tjukarurru

nyinanytjaku. Yañangu kutjupa tjutaku palya nyinanytjaku, pikarrinytjawiya. Yañangu kutjupaku palyalkitjangku tjukarurru watjara palyantjaku, wantintytjawiyanngku. ¹⁰ Mayutju Yiitjuku nyurrangarri tjukarurru nyinanytjaku ngunytyntjunkunytyntjawiya. ¹¹ Yiitju Kurayitjaku ngurrpa tjutangkuya tjaalpangku kuya palyalpayi, kutjupa tjutangku nyakupayingka. Yalatji wiyanurra tjanala tjungurringkula kuya palyantjaku, wantintytjaku. Tjana yalatji kuya palyantjala, marrkula tjananya!, wantintytjakuya, tjukarurrulpiya nyinanytjaku. ¹² Paluru tjana tjaalpangku kuya puntu palyalpayi. Yañangu kutjupangku tjakulpa kulira yulta puntura kuntuarrinkula yalatji kulilpayi, “Kuya puntu paluru palyani.” ¹³⁻¹⁴ Nganana Yiitju Kurayitjakuṇu wangkaku nintirringkula nganana yalatji kulinī, “Paluru tjana tjaalpangku kuya puntu palyalpayi.” Yalatji Katutjaku wangka yirriti wakara tjunutja ngarrinyi.

“Kuya palyara nyinapayi tjutangkunyurra Kurayitjakuṇu wangkalpi kulintjaku.”

¹⁵⁻¹⁷ Walytja tjuṭa, kulilaṇiya! Yiitju Kurayitjaku wangka nintirringkula nyurrangarri palumpa tjukarurru nyinanytjaku, wiya Katutjaku ngurrpa tjuṭa nguwanpa nyinanytjaku. Kuwarri iltu kuya palyara nyinapayi tjuṭa nyinanyi. Tjanala tjungurrinytjawiya nyurrangarri Yiitju Kurayitjanya tjapila yalatji!, “Nyuntupa waarrka nyaā nguwanpana ngayulu palyalku? Nintilaṇi!, ngayulu waarrka palunya tjukarurru nyuntupa

palyantjaku." Yalatjiku nintirringkula nyurrangarri palumpa waarrka palyantjaku. ¹⁸ Waama tjikira turaangkarrinytjawiyaya nyinama! Kutu turaangkarringkula nyinarra yaŋangu tiltirrmankupayi. Wiyanyurra waamaku kutju kulira nyinanytjaku, Katutjaku kurrunpaku kutjunyurra tjukarurru kulira nyinanytjaku. Kurrunpa paluru nyurranya nintintjala yalatjinyurra palyara tjukarurru nyinanytjaku. ¹⁹ Nyurrangarri tjungurringkula Katutjaku tulkungka warrantjaku Katutjanya walkulkitjangku. Tulku kuwarritja tjuta anta irriṭitja tjutaṭarranyurra warrantjaku, tulku mayutju Tapitalu wakanutja tjutaṭarra palyanyurra warrantjaku. ²⁰ Yiitju Kurayitjanya nganampa mayutju nyinanyingka nganaŋa kuntuṭarrinytjawiyangku kutu paapa Katutjanya walkuntjaku yalatji, "Nyuntu nganaŋanyatju yanṭayanṭara yuwankarra yungkupayi. Nganaŋatju nyuntunya wal̄kuṇi."

Miṭararrapula yalatji nyinanytjaku

²¹ Yiitju Kurayitjaku walytja kutjarra nyupali nyinanyi miṭararra. Palya nyupali tjungu nyinanytjaku pikarrinytjawiya. Kungkangku watjantjala watingku kulira palyantjaku. Watingku watjantjala kungkangku kulira palyantjaku. ²² Kungka miṭatjarra tjutangkunyurra yalatji kulintjaku. Mayutju Kurayitjakunyurra tjukarurru nyinanyi, palumpa wangka kulira. Palunya nguwanpa nyuntupa miṭaku wangka kulira tjukarurru nyinanytjaku. ²³ Kungka miṭatjarra

tjuṭangkunyurra yalatji piyuku kulintjaku. Mayutju Kurayitjalu nganañanya palumpa walytja tjuṭa yanṭayanṭanı. Palunya nguwanpa wati miiṭatjarrangku mayutjungku miiṭa walytja yanṭayanṭantjaku. Yiitju Kurayitjanya yanangu tjuṭangka munkarralingku mayutju tiṇa nyinanyi paluru nganañanya ngulytjura kanyinmalpa palumpa ngurrangka. ²⁴ Wangka palunya nguwanpa kungka miiṭatjarra tjuṭangku miiṭa walytjaku wangka kulira nyinanytjaku, nganaña mayutju Yiitjuku wangka kulira nyinapayi nguwanpa. ²⁵ Wati miiṭatjarra tjuṭangku wangka ngaatjanya kulintjaku. Yiitju Kurayitjalu nganañanya palumpa walytja tjuṭa kutu yanṭayanṭalkitja yunytju nyinarra mirrirringu. Yalatji nguwanpa nyurrangarri miiṭa walytja kutu yanṭayanṭalkitja yunytju nyinanytjaku. ²⁶ Paluru watjaṇu palumpa walytja tjuṭa papatatjimirntjaku wangka yalatji watjara, “Ngayuluṇanta papatatjimirni. Mayutju nyuntupa nyinanyi yini yalatji, paapa Katutjanya, palumpa katja, palumpa kurrunpaṭarra.” Paluru yalatji watjaṇu tjana papatatji mantjira Katutjaku walytja tjuṭalpiya nyinanytjaku. ²⁷ Yiitju Kurayitjalu panyapa watjara yalatji kuliṇu, “Ngayuku walytja tjuṭaya palya nyinaku, tjukarurru kutu.”

²⁸⁻³⁰ Wati miiṭatjarra tjuṭangku wangka ngaatjanya kulintjaku. Nganaña wiya walytjangkulanku pungkupayi yayinatjarrangkupaka marangku, nganaña walytjangku yanṭayanṭalkitjangku kuliilpayi yalatji, “Ngayuluna paṭjtajirrangku ngalkura palya

nyinaku. Warringkamarraña ngayulu tjaampa mantjira tjarrpaku.” Yalatji nguwanpa nganaña kulira walytjangku yanṭayanṭalpayi. Wangka palunya nguwanpa nganaña wati miṭatjarra tjutangku miṭa walytja kulira yanṭayanṭantjaku. Palunya nguwanpa Yiitju Kurayitjalu nganañanya palumpa walytja tjuta kulira yanṭayanṭanṭaṇi.³¹ Katutjaku wangka yirriṭi wakara tjunutja yalatji ngarrinyi, “Watingku paapa maamaṭarra wantirra kungka yaltirra miṭararralpipula nyinanyi. Yalatjipula rawa nyinarra walytja yilatja nguwanpa nyinapayi.”³² Nganaña puṭu kulinji, “Yaalytjiyaalytji?, kungka waṇma ngurrara ngalya yankula marriṭirringkula wati palumpa walytja yilatja nguwanpangka nyinanyi? Wati paluru kungka palumpa yilta walytjarringanyi.” Yara palunya nguwanpa Yiitju Kurayitjanya yilta nganampa walytjarringu, palumpa walytja tjutangka.³³ Wangka palunyanyurra kulintjaku. Nganaña walytjangku kulira yanṭayanṭalpayi. Wangka palunya nguwanpa nganaña wati miṭatjarra tjutangku miṭa walytja kulira yanṭayanṭantjaku. Wangka palunya nguwanpa kungka miṭatjarra tjutangku miṭa walytja kulira yanṭayanṭantjaku.

6

Mayutju kulira tjukarurru nyinanytjaku

¹ Pipirri tjuta, nyurrangarri Yiitjuku walytjarringkula, wangka ngaatjanyaya kulila! Yiitju Kurayitjaku walytjanyurra nyinarra paapaku maa-

maku wangkakunyurra tjukarurru kulira nyinanytjaku. Yalatjinyurra tjukarurru nyinanytjaku. ²⁻³ Katutjaku wangka tiña, wangka kutjupa tjutangka munkarra yalatji piipangka ngarrinyi, “Paapaku maamakuṭarranyurra tjukarurru nyinanytjaku. Wangka pulampa kulira palyantjaku.” Wangka panyapa watjara Katutjalu wangka kutjupalpi yalatji watjañu, “Palumpa kutjarrakunyurra tjukarurru nyinarra, manta ngaangkanyurra palya nyinamalpa rawa.”

⁴ Paapa tjutangku, maama tjutangkuṭarra Yiitjuku walytjarringkula wangka ngaatjanyaya kulila! Pipirri tjuta tjananya wiya nyurrangarri yunytjuwiyangku payintjaku, tjana pikarringkula nyinapayingka nyupalimpalpi. Yunytjungku nyurrangarri tjananya tjukarurru yanṭayanṭantjaku. Kanyira tjananya nyupali Yiitju Kurayitjakuṇu wangka nintintjaku, tjana kulira Yiitjuku tjukarurru nyinanytjaku.

Irriti Puulanya nyinanytjala mayutju kutjungku waarrkana tjuta kanyilpayi palumpa ngurrawana kutu waarrkarrinytjaku. Luwu tjanampa ngarangu waarrkana tjuta mayutju walytjaku kutju tjana kutu waarrkarrinytjaku, mayutju kutjupaku waarrkarrinytjawiya. Mayutju paluru tjananya wiitjimani yungkuwiyangku mangarri mantarraṭtarra yungkula yanṭayanṭalpayi.

⁵⁻⁶ Waarrkana tjuta Yiitjuku walytjarringkula, wangka ngaatjanyaya kulila! Mayutju walytjakunyurra kutu tjukarurru nyinanytjaku. Yiitju Kurayitjaku wangka nyurrangarri kulira tjukarurru palyalpayi. Wangka palunya nguwanpa nyurrangarri Mayutju walytjaku

wangka kulira tjukarurru palyantjaku. Nyuntupa mayutjungku wiya nyanganyingka kutu palumpa wangkawana kulira tjukarurru waarrkarrinytjaku. Nyurrangerri Yiitju Kurayitjaku waarrkana tjuta nyinanyi, Katutjalu kulinji nyurrangerri mayutju waltytjaku tjukarurru nyinanytjaku.

⁷ Tjinguru nyuntupa mayutju waalangka nyinanytjawiyangka Yiitju Kurayitjanya yankula waala palula mayutju nyinamara. Nyuntu palumpa wangka kulira tjukarurru palyanmara. Palunya nguwanpa nyuntu mayutju waltytjaku wangka kulira tjukarurru palyantjaku. ⁸ Tjinguru nyuntu mayutju waltytjaku kulira kutu tjukarurru palyantjala ngula Katutjalu nyuntunya yunyparringkula kana kanyilku palumpa ngurrangka. Tjinguru yanangu kutjupangku waarrkanawiyangku yanangu kutjupa tjutaku tjukarurru palyalku. Yalatji palya tjanampa palyantjala, waarrkana nguwanpaku Katutjalu palunya yunyparringkula kana kanyilku palumpa ngurrangka.

⁹ Waarrkanaku mayutju tjutanyurra Yiitjuku waltyjarringkula wangka ngaatjanyaya kulila! Waarrkana tjuta nyurrangerri purinypa yantayan̄tara kanyintjaku, pungkula kanyintjawiyangku. Mayutju tiŋa ilkari ngurraranyurra mayutju tjutangku kulila! Paluru waarrkana tjutaku mayutju nyinanyi, nyurrangarimpa mayutju tjutakutarra. Paluru wiya mayutju tjutaku kutju yunyparringanyi, yuwankarraku yunyparringanyi, waarrkana

tjuṭakuṭarra.

*Mamuku mayutjungku tjingapunganyingka
wiyanyurra kulintjaku*

¹⁰⁻¹¹ Nyurrangarri wangka ngaatjanyalpi kulintjaku. Yiitju Kurayitjaku walytjanyurra nyinarra palunya tjapintjaku, paluru nyurrangarrinya rapantjaku, mamuku mayutjungkamarra. Katutjalutarra nyurrangarrinya rapalku Yiitjuku tjukarurrulpi nyinanytjaku. Paluru nyurrangarrinya rapalku mamuku mayutjungku tjingapunganyingka kuliranyurra wantinytjaku.

¹² Yañangu tjuṭangku kutju wiya nganañanya tjingapunganyi, Yiitjuku wangka wantinytjaku, mamuku mayutjungku, palumpa waarrkana tjuṭangkuṭarra nganañanya tjingapunganyi.

¹³ Nganaña Katutjanya tjapintjaku paluru nganañanya rapantjaku. Nganaña rapa yalatji kutu ngaranytjaku, mamuku mayutjungku nganañanya tjingapunganyingka, Yiitjuku wangkawana kutju nyinanytjaku tjukarurru, kulira kutjupawana yankunytjawiya.

¹⁴ Nyurrangarri Katutjaku wangkawana kutu nintirringkunytjaku. Nintirringkula tjukarurru nyinanytjaku, wangka tjukarurru kutju wangkanytjaku, ngunytji watjantjawiya. Yalatjinyurra tjukarurru nyinarra mamuku mayutjungku tjingapunganyingka palumpa wangkanyurra kulira wantiku, Katutjaku wangkawana kutju nyurrangarri nyinanytjaku.

¹⁵ Yiitjukuṇu wangkawananyurra nintirringkula parra tjakultjurinkunytjaku. Yañangu tjuṭangku wangka palunya kulira Katutjaku kalypalpiya

nyinaku. ¹⁶ Kutu nyurrangarri Yiitjuku wangka kulira tjukarurru nyinanytjaku, mamuku mayutjungku tjingapunganyingka palunya kulilwiya tjukarurru kutu nyinanytjaku. ¹⁷ Nyurrangarri Katutjaku walytjarringkula yankula yanangu tjutangka tjakultjunkunytjaku. Katutjaku kurrunpangku nyurrangarrinya nintilku palumpa wangka tjukarurru tjananya tjakultjunkunytjaku.

¹⁸ Katutjaku kurrunpangku nyurrangarrinya ninti^{ningka}, kutjupa tjutaku tjapintjaku. Kutu tjanampa nyurrangarri Katutjanya tjapintjaku, purrkarrinytjawiyangku. Yiitjuku walytja tju^{ta}kutarra nyurrangarri tjapintjaku. ¹⁹ Ngayukutarra nyurrangarri tjapintjaku ngayulu Yiitjuku wangka tjukarurru tjakultjunkunytjaku, ngulurrinytjawiyangku. Wangka Yiitju Kurayitjanyatjarra palunya yirriti Katutjalu kutju kulilpayi, paluru wangka palunya yutiⁿulpni ngayulu tjakultjurinkunytjaku. ²⁰ Katutjaluni iyanu waarrka palunya palyarinkunytjaku. Palumpa wangka Yiitjunyatjarra ngayulu tjakultjurinutjangka tjana ngayunya tjiilangka tjarrpatjunu. Kuwarri ngayulu tjiilangka kutu nyinanyi. Yuwa, ngayukutju nyurrangarri Katutjanya tjapintjaku, ngayulu palumpa waarrka tjukarurru palyantjaku.

Piipa wakara wiyarrikitjangku watjalku

²¹⁻²² Wati Titjikatjanya ngayulu nyurrangarimpa wantirriyalku, paluru nyurrangarrinya wangka ngayunyatjarra tjakultjunku. Paluru

nyurrangarrinya tjakultjunku ngayulu
tjiilangka nyinarra Yiitjuku waarrka
palyaɳutjangka. Paluru nyurrangarrinya
wangka ngayunyatjarra, Katutjaku wangkaʈarra
nintintjala nyurrangarri yunypalpi nyinaku.
Titjikatja paluru nganampa walytja nyinanyi,
paluru Yiitjuku waarrkana palya nyinanyi.

²³ Ngayulu paapa Katutjanya tjapinmalpa
paluru Yiitju Kurayitjaluʈarra nyurrangarrinya
yanʈayaɳtanjaku. Yalatji paluru kutjarrangku
nyurrangarrinya yanʈayaɳtanjala nyurrangarri
yunypa nyinaku, yanangu kutjupa tjuʈaku yun-
ytju nyinarra Yiitjuku tjukarurru nyinamalpa.

²⁴ Ngayulu yunytjurringanyi Katutjalu nyur-
rangarrinya altururringkula yanʈayaɳtanjaku,
nyurrangarri kutu Yiitju Kurayitjaku tjukarurru
nyinanytjala. Yiitju paluru ilta nganampa
mayutju nyinanyi.

Luritja Bible

The New Testament and selected portions of the Old Testament in the Luritja language of Australia

copyright © 2006 Bible Society of Australia

Language: Luritja (Pintupi-Luritja)

Dialect: Luritja

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-01-06

PDF generated using Haiola and XeLaTeX on 11 Nov 2022 from source files dated 7 Jan 2020

87b44b8a-66cc-5a79-8b77-3942a674d88b